

Exact 30 onns suenter che Felix Venzin da Mustér ei vegnius eligius ella suprastonza dall'Associaziun professiunala da carn dil Grischun eis el seretratgs da quella. 12 onns eis el staus president. En quei liung temps d'engaschament ha ei dau novitads fetg negativas pils mazlers, mo els han era mussau bia senn per innovaziun.

HANS HUONDER/FMR

A Mustér ei *Felix Venzin* (62) vegnius eligius ella suprastonza igl onn 1991 ed a Mustér eis el seretratgs. La mesjamna ein ils mazlers grischuns seradunai en claustra e han salvau lur radunonza generala ella Sala Peter Kaiser. A quella ha Felix Venzin mirau anavos sin treis decennis d'engaschament intensiv. El ei staus expert sin fieras d'animals ed exposiziuns da products, mo era responabel per la cumissiun da reclama. La FMR ha discurrei cul mazler che ha siu menaschi amiez il vitg da Mustér e che meina era ina filiala a Laax. L'Associaziun professiunala da carn dil Grischun dumbrava 52 commembers.

Felix Venzin, Vos essas stai 30 onns commember dalla suprastonza dils mazlers dil Grischun, da quei dudisch onns sco president. Tgei ha animau Vos da s'engaschar aschi ditg per quell'organizaziun?

Jeu sundel mazler cun tgiert ed olma ed il contact cun glied ei per mei impurtonts. Naturalmein che las sfidas da nossa branscha han interessau e motivau mei da s'engaschar. Jeu patratgel per exempel vid nossa cumissiun da reclama che ha lantschau én quei temps il Vitalone. Quei product ei aunc oz in grond success. Avon che vegnir eligius in suprastonza erel jeu gia expert sin fieras ed il contact cun bia glied era gia daus. Leu hai jeu era survegniu profunda investa al giudicament dils animals. Jeu lavurel bugen cun glied cun la medema idea e filosofia. Lu eis ei pusseivel da metter fetg bia en moviment e haver success. Quei ei per exempel era stau il cass durant miu temps sco expert da qualidad ad exposiziuns dils mazlers ell'entira Svizra. Tut quei ha enrihiu la veta professiunala, era sche nus mazlers essan en quei senn gie concurrents. La collaboraziun enteifer la suprastonza ei adina stada fetg collegiala.

En quels onns ha ei dau biaras midadas, surtut sil sector dalla higiena. Tgeininas ein quellas ch'ei restadas il meglier en memoria a Vos el senn positiv sco negativ?

Sco president hai jeu giu tut auters contacts ch'avon ella cumissiun da reclama ni expert. En quella funcziun eis ei necessari da sefatschentar era cun leschas novas, incumbensas fundamentalas dils mazlers sco fatgs da controlla ni higiena. Aschia ei il contact cul veterinari cantunal fetg impurtonts. Durant diesch onns ei quei stau cun Rolf Hanimann, ils davos onns Giochen Bearth. En quei temps ha ei surtut era giu num defender ils mazlers, surtut ils pigns. Biaras directivas e midadas vegnan introducidas per mazlarias

grondas e tut quellas ein buca adina ni mo parzialmein applicablas en mazlarias pintgas. Quei ei per exempel stau il cass tier las controllas da tuts menaschis che mazzavan. Entgins han stuiu serrar quella partiziun damai ch'els savevan ni levan buca ademplier las cundiziuns. En tuttas discussiuns – buca mo pertuccont menaschis da mazzar – havein nus denton adina anflau consens. Far endreg a tuts sa denton negin. La funcziun da president ei cumbinada cun bia lavur che negin vesa. In dils fatgs propi negativs ei il scandal da Carna grischa staus. Schegie che quei menaschi era buca commember da nus, ha quei giu in effect malemperneivel per l'entira branscha da carn el Grischun.

Differentias malsognas d'animals han caschunau fastedis - era als mazlers - durant quels onns. Tgei effect han quellas giu per la branscha e sia clientella?

La malsogna dalla stuornadad bovina ils onns 1990 ei a mi aunc en buna memoria, jeu erel gest en suprastonza. Quei ei stau ina frida nundetga per la branscha da carn. Cuort avon haveivel jeu mazzau duas genetschas e hai pratica-

«Tgi che vul magliar carn duei astgar far quei – nus scumandain era a negin da magliar salata.»

Felix Venzin

Dus novs suprastonts

Alla 111 avla radunonza generala dall'Associaziun professiunala da carn dil Grischun a Mustér ein il president *Felix Venzin* da Mustér e *Hansjakob Möhr* da Maiavilla seretratgs dalla suprastonza. Niev president ei *Orlando Strub* da Spligia. Sco suprastont eis el staus entochen ussa reponsabls per fieras e medias. Da niev en suprastonza entran *David Steier* da Savognin e *Jean-Claude Zimmermann* senior da Glion. Vegni reelegi en suprastonza ein *Reto Zanetti* da Scuol e *Florian Rudin* da Serneus.

mein saviu magliar mez la carn. Lu ha ei denton era dau cass da salmonellas. Da quels dat ei deplorablamein adina puspei, dapertut dat ei «nuorsas nerass». Lu denton era cass nua ch'ei vegn buca mazzau correctamein. Da tut quels cass pitescha lu l'entira branscha. Per la suprastonza ni il president dat quei buca exnum dapli lavur, mo mintga mazler sto far ponderaziuns co el vul declarar quei alla clientella. Ils mazlers ein pertuccai da directivas fetg severas, mintga dus onns han tut quels che mazzan d'absolver in cuors obligatori. Il veterinari ei cheu avon ch'ins mazzi in animal e lu era per la controlla dalla carn. Mintga animal ei era registraus claramein. La carn da mintga ligiongia san ins exact da tgei animal ch'ella ei, cu quel ei vegnius mazzau e nua.

Bia glied ei pli e pli sensibilisada per la carn sco mied da consum. Co seconfruntan ils mazlers cun quella realitad?

Mintgin sto decider sez sch'el vul magliar carn ni buca. Igl ei denton buca correct sch'ins fa schliata cunscienza a quels che maglian carn. Nus scumandain era buca ad enzatgi da magliar salata. Nus empruein era da porscher products a vegetaris e vegans en nossas stizuns. Era ils consumers da carn ein sensibilisai. Per quei motiv emprovan fetg biars mazlers pigns da luvrar cun products indigens. Nies menaschi per exempel lavura cun purs dalla regiun. Nus lein era mussar alla clientella danunder che la carn deriva – nus lein esser verdeivels. Quels che mazzan buca sez animals cumpran la carn tier collegas. Pertuccont quels fatgs ha l'unien dils mazlers denton negin'influenza.

In problem pils mazlers dil vitg ei la concorrenza dils detaglists gronds. Tgei muntan quels pils mazlers pigns igl avegnir, surtut ella periferia?

Igl avegnir dils mazlers pigns ei segiramein ina sfida – ell'entira Svizra. Jeu sundel denton perschuadius che tut quels che lavuran verdeivel cun products regiunals han in bien avegnir. El center dils products dils menaschis pigns ston specialitads star. Culla gronda massa savein nus numnadamein buca concorrenzar. La qualidad ei ozildi era buna tiels pli biars gronds. Sco mazlers pigns havein nus era la pussevildad da reagir fetg spert sin tendenzas novas, sin giavischs individuals dalla clientella. Igl ei denton clar che la tendenza schai els mauns dil consum. Sch'ins giavisch da haver era igl avegnir in mazler cun products regiunals el vitg, sche vegn quei ad esser aschia. La perfecziun dils mazlers va oz claramein ella direcziun d'esser innovativs pertuccont specialitads. Cheu en muntogna havein nus in grond potenzial per tals products.